

A DESULO PRO MONTANARU

Desulu, s'avisu in su giornale
hat pro commemorare a Montanaru,
a onorare custu fizu caru
li pone pro amentu unu signale.

M'inchino e mi leo su berrette,
dignamente, saludo zente e logu,
m'imbenujo in sa tumba 'e Antiogu
e naru, sa preghiera a su poette.

De fronte a cussu Crocefissu
prima e minde pesare reu,
una preghiera naru a Deu
chi nde nascat un'ateru che issu.

Che sordadu e mastru d'insignamentu
cun sos propios suos sentimientos,
naturales, poeticos talentos
pro torrare a cantare a Gennargentu.

A recitare in sardu sa cantone
a sos piseddos chi no l'hana letta;
e a conoschere su sardu poetta
su c'hat cantadu donnia puzone.

E los'insegnas a movere sas laras
comente narat sa sarda natura,
tue, ca ses su babbu e sa cultura
sa limba e sardigna lis'imparas.

Torra Montanaru a custa terra
e, pesatinde dae cussa losa;
custa zente de tene bisonzosa
pro sa paghe, est'ancòra in gherra.

In s'adde, in sa pala, e sa collina
ue fit sole nettu chene nue,
come no'est che cando fis tue
s'aria antiga sana, frisca e fina.

In su monte in totta sa cussolza
best'ancora sa ezza caminera,
sa tratta, su passazu e sa fera
e cudda pedra manna settidolza.

T'amentana sa zente e su nuraghe
in cudda barbagina passizzata,
cando las'has de rimas semenada
benit como e semina sa paghe.

MORISCU

GIOVANNI MARICOSU
OLIANA